

TESALONICENSES

Pablo quia_{in}'₅₄ ri_{in}'₅₄ jmo₂₃ si₂ a₂chein₃ ne₄ Guá'₅ i₂chan₂ juig₂
Tsalónika

1 ¹ Jniá₂ Pa₄, quia_{in}'₅₄ Silvano,^a Timoteo né₃, jmo₂₃ si₂ la₂
a₂dsiang'₅₄ ne₄ dsa₂ i₂ma₂'én₂ le₃quió'₅ Jesús, i₂chan₂ juig₂
Tsalónika, dsa₂ i₂'ei₅ caun₂ jág₁ quia_{in}'₅₄ Diú₄, quia_{in}'₅₄ Te₁gui'₅₄
Jesucristo né₃. Jui₁jme₂gu'₅₄ Diú₄ 'nia'₂. Jui₁'ei₅ bá₄ tei₄ tion'₅₄ 'nia'₂
quia_{in}'₅₄ 'éi'₃ quió'₅ Diú₄ Jmei₂ jniog₄, quia_{in}'₅₄ 'éi'₃ quió'₅ Te₁gui'₅₄
Jesucristo né₃.

Cha₂ léi₄ ja₁con₂ dsa₂ chan₂ Tsalónika ia₁ a₂'éin₂

² Ca₂le₃jé₃ jmi_g₄ bá₄ cuë₂ jnia'₅₄ ti₁'mag'₄ Diú₄ o₄quián'₂ 'nia'₂
ca₂le₃jín₃. Jë₁ma₂të₂ rë₁chi₁len'₄ jnia'₅₄ Diú₄, dsau'₂ bá₄ dsi₅ jnia'₅₄
'nia'₂. ³ Dsau'₂ bá₄ dsi₅ jnia'₅₄ 'nia'₂ ne₄ Diú₄ Jmei₂ jniog₄, ia₁ 'ñio₅ lin₃
ma₂jmo'₅₄ 'nia'₂ ta₁ cha₂ léi₄ ja₁con'₂ 'nia'₂ ia₁ 'éng'₂, ia₁ 'ñio₅ lin₃
jme₂ti'₅₄ 'nia'₂ ta₁ ne₄ Te₁gui'₅₄ 'uig₅₄ ia₁ a₂'niói'₃ 'nia'₂. Jaun₂ caun₂ bá₄
le₁'ág₄ 'au'₂ 'nia'₂ a₂'ín₂ 'au'₂ le₃quió'₅ Te₁gui'₅₄ Jesucristo quián'₂ jniog₄.
⁴ Rin'₅₄ jniog₄, 'nio₃ bá₄ Diú₄ 'nia'₂, ne₄ bá₄ jnia'₅₄ a₂ma₂quióin'₂ 'nia'₂.
⁵ Lia'₂ con'₂ jme₁ca₂jme₁tin₅ jnia'₅₄ 'nia'₂ jág₁ dse₃, on₃jua'₅₄ jmá'₃
quia_{in}'₅₄ jág₁ jaun₂ jme₁né₄. Ia₁ jme₁quia_{in}'₅₄ bá₄ jui₅bí₂ quió'₅ Jme₂dsí₂
Jñió₅ ján₃, ca₂'é₄ jág₁ dse₃ la₂ jin'₄ 'nia'₂. Jaun₂ caun₂ bá₄ 'ei₅ dsi₅ jnia'₅₄
ia₁ Jme₂dsí₂ Jñió₅ bá₄ jmo₃ jme₃'uá₂ 'au'₂ 'nia'₂ a₂le₃'éng'₂. Ní'₅₄ bá₄
'nia'₂ dse₃ 'a₂ lia'₂ ca₂tió'₄ jnia'₅₄ jin'₄ 'nia'₂ a₂dse₃ quián'₂ bá₄ 'nia'₂
jaun₂.

⁶ 'Nia'₂ né₃, ca₂quia_{in}'₂ 'nia'₂ jui₅ a₂ca₂quián'₁ jnia'₅₄, a₂ca₂can₃
Te₁gui'₅₄ né₃. Ca₂gue'₅₄ bá₄ 'nia'₂ a₂'ñio₂ 'au'₂ jág₁ dse₃. Chan'₂ bá₄ 'nia'₂
o₂'ñio₃ o₂jnia₃ 'au'₂ a₂jmo₅ Jme₂dsí₂ quián'₅ Diú₄, tsá₃ a₂nag₅₄ jaun₂
ca₂quín₂ a₂ca₂i₃ñí'₂ 'nia'₂ uig₅ 'ñio₅ lin₃ 'uig₅₄ jág₁ dse₃. ⁷ Jaun₂ le₂në₅ bá₄
ca₂dsi₃nó'₅ 'nia'₂ ca₂cuë'₅₄ 'nia'₂ caun₂ jui₅ dse₃ jaun₂ ca₂caun₃ 'í₁
ca₂le₃jín₃ dsa₂ i₂'én₂ le₂tan₅₄ juig₂ te₁'i₁ 'uë₃ Macedonia quia_{in}'₅₄ le₂tan₅₄
'uë₃ Acaya né₃. ⁸ Jaun₂ le₂në₅ ma₂ca₂'ë'₅₄ 'nia'₂ dsa₂ jág₁ dse₃ quió'₅
Te₁gui'₅₄, on₃jua'₅₄ jmá'₃ dsa₂ chan₂ Macedonia quia_{in}'₅₄ Acaya
ma₂qui₂ma₂'ë'₅₄ 'nia'₂ jág₁, ia₁ ca₂le₂con₂ ja₁siá'₂ bá₄ ján₃ le₁ñi₅ dsa₂
a₂lín'₂ 'nia'₂ dsa₂ i₂'én₂ quián'₅ Diú₄. Jaun₂ tsá₃ ma₃'e₂ jua'₅₄ 'nió'₅ gué₄
chei₅₄ jnia'₅₄ 'i₁caun₂ 'nia'₂. ⁹ Të₂le₃ dsia₅ bá₄ 'éi₂ guioin₅₄ a₂ca₂guei'₅₄
'nia'₂ dse₃ jnia'₅₄, dsia₂₃ 'a₂ lia'₂ ca₂tí'₃ a₂jme₁'éng'₂ të₂le₃ quió'₅ diú₄
lag₄, a₂ca₂rë₃'én'₂ 'nia'₂ të₂le₃ quió'₅ Te₁gui'₅₄, ca₂jme₁ti'₄ ne₄ Diú₄ jén'₃

^a1 Lia'₂ chen₂ Silvano, co₂rë₂ quia_{in}'₅₄ Silas.

dsón'₂ i₂chan₂. ¹⁰ Dsia₂₃ bá₄ ján₃ 'a₂ lia'₂ tion'₅₄ 'nia'₂ le₁jan'₄ a₂jñió'₂
táng₃ jui'₅ guei'₅₄ i₂jui'₃ Jesús Ja₁ñi'₅₄ Diú₄ i₂ca₂jme₃jein'₅₄ jin₄ 'lag₄.
I₂'éi₂ bá₄ lió₂ jniog₄ ne₄ a₂'i₄ 'nei₂ dsí₅ Diú₄.

Ta₁ a₂ca₂jmo₃ Pablo juig₂ Tesalónica

2 ¹ Ia₁ ñi'₅₄ bá₄ 'nia'₂ guiong'₅₄, rin'₅₄ jniog₄, tsá₃ jua'₅₄
a₂lë₁ca₂i₁náu₄ jnia'₅₄ ca₂i₁jin₁ 'nia'₂. ² Ia₁ ma₂ñi'₅₄ bá₄ 'nia'₂, tē₂le₃
ca₂jme₃'o₅₄ bá₄ Diú₄ ca₂nio₃ tiá₂ dsi₅, ca₂'é₄ jnia'₅₄ ja₁con'₂ 'nia'₂ jág₁
dse₃ a₂lión₂ dsa₂, o₁jñia'₅₄ ca₂jmóg'₂ dsa₂ ca₂tē₂ca₂'o₂ juig₂ Filipos
le₂jñiá₅. ³ Ia₁ jág₁ a₂ca₂tion'₅₄ jnia'₅₄ 'nia'₂, on₃jua'₅₄ a₂já₃ 'uig₅₄ ia₁
a₂i₂gon₂ jnia'₅₄, on₃ guē'₂ o₄quíó'₄ ia₁ a₂dsi₂jñia₅ dsi₅ a₂'lig'₅₄, on₃ guē'₂
jua'₅₄ ia₁ a₂jme₂gán₁ jnia'₅₄ 'nia'₂. ⁴ Tē₂le₃ ia₁ Diú₄ bá₄ ca₂cáun₃ 'í₁ a₂jmo₂
jnia'₅₄, ca₂dsia₃ gu₂ jnia'₅₄ a₂qui₁'é₄ jág₁ dse₃. Jaun₂ le₂nē₅ jui₁lia'₂ jág₁
a₂jua'₂ jnia'₅₄, on₃jua'₅₄ a₂jua'₂ ia₁jaun₂ 'ñio₂ dsí₅ dsa₂ mi₂güí₃, tē₂le₃
ia₁jaun₂ 'ñio₂ dsí₅ Diú₄ bá₄ i₂con₂ 'í₁ tē₂dsi₅ jniog₄. ⁵ Ñi'₅₄ bá₄ 'nia'₂,
'i₁cón₂ tsá₃ jua'₅₄ ca₂dsiá₁ jnia'₅₄ jág₁ rau₂, on₃ guē'₂ jua'₅₄ ca₂'má₂
jnia'₅₄ jág₁ a₂tsá₃ dsi₂ten₅₄ 'má₂ ia₁jaun₂ léi₂ cu₄. Jág₅ bá₄ Diú₄ ca₂le₃jé₃
a₂ca₂jmó₁. ⁶ Tsá₃ a₂jaun₂ 'niog₂ jnia'₅₄ jua'₅₄ a₂jme₃juag'₂ dsa₂ 'ñio₅ lín₃,
on₃ guē'₂ 'nia'₂, on₃ guē'₂ dsa₂ sián₂ 'né₃, o₁jñia'₅₄ jme₁ca₂tág₂ rē₂ jnia'₅₄
jmó₁ 'éi₃ jaun₂ ia₁ a₂lág₅ dsa₂ i₂chen₄ quián₅ Cristo. ⁷ Tē₂le₃ ca₂jmó₁ bá₄
jnia'₅₄ 'ua₁ dsi₅ ja₁con'₂ 'nia'₂, jui₁lia'₂ lín₅ jan₂ chog₅₄ chi'₂, a₂jme₂cain'₅₄
chi'₂ quián₅ qui₂jmo₂₃ 'í₁. ⁸ Jaun₂ lē₃ 'ñio₅ lín₃ ca₂rē₃ 'nio₃ jnia'₅₄ 'nia'₂,
ca₂lia'₂ jnia'₅₄ on₃jua'₅₄ jmá'₃ jág₁ dse₃ quió'₅ Diú₄ nē₅ ca₂tág₂ jnia'₅₄
cuē₁, le₂jniog₅ jme₂dsí₂ quián₂ jnia'₅₄ 'ñio₂ dsi₅ cuē₁ ján₃. Ia₁ ma₂dsi₂nó'₅
'nia'₂ léng'₂ dsa₂ i₂'nió₄ lín₃ quián₂ jnia'₅₄. ⁹ Jua'₂ jnia'₅₄ le₂nē₅, rin'₅₄
jniog₄, ia₁jaun₂ dsá₂ bá₄ 'au'₂ 'nia'₂ 'a₂ lia'₂ ca₂jmó₁ jnia'₅₄ ta₁ a₂ca₂lag₃
a₂que₅₄. Lia'₂ 'uē₂jmi₂ bá₄ qui₂ca₂jmó₁ jnia'₅₄ ta₁, ia₁jaun₂ 'i₁jan'₂ 'nia'₂
tsá₃ jua'₅₄ 'ein₂ 'ñio₅ guei₂ ca₂can₃ quian'₅₄ jnia'₅₄, tē₁lia'₂ ca₂tió'₄ ca₂'é₄
jág₁ dse₃ quió'₅ Diú₄.

¹⁰ Ca₂tē₂ bá₄ ne'₅₄ 'nia'₂, jág₅ bá₄ Diú₄ ján₃, ca₂tió'₄ jnia'₅₄ quian'₅₄
'nia'₂ dsa₂ i₂én₂, a₂lág₅ jnia'₅₄ dsa₂ jñió₅, dsa₂ dsen₃, i₂tsá₃ 'ein₂ lé₂
le₃bóg'₂ dso₄. ¹¹ Ñi'₅₄ bá₄ 'nia'₂ ján₃, ca₂jmó₁ jnia'₅₄ jin'₄ 'nia'₂ jui₁lia'₂
jmo₅ jan₂ jmei₂ dsa₂ jmái'₂ chi'₂ quián₅, qui₂ca₂cuē₅₄ jnia'₅₄ bí₂ 'nia'₂,
ca₂tion'₅₄ jnia'₅₄ jág₁ 'nia'₂ jaun₂ náu₁ tiá₂ jui₅ dse₃. ¹² Jaun₂
qui₂ma₂chei₅₄ bá₄ jnia'₅₄ 'nia'₂ a₂i₁niog'₄ lia'₂ con'₂ dsi₂ten₅₄ i₂nio₄ dsa₂
quián₅ Diú₄ i₂tē₂ a₂jme₁quiain'₄ 'nia'₂ ja₁jmo₂₃ 'éi₃ guei'₅₄ i₂jui'₃ ja₁lé₄
co₂tág₅ co₂'né₅ quió'₅.

¹³ Jaun₂ lē₃, ca₂le₃jé₃ jmig₄ bá₄ cuē₂ jnia'₅₄ ti₁'mag'₄ Diú₄. Ia₁ le₂'uig₅₄
jme₁ca₂nei'₂ 'nia'₂ jág₁ dse₃ quió'₅ Diú₄ a₂ca₂jua'₅₄ jnia'₅₄, ca₂gue'₅₄ bá₄
'nia'₂ con'₂ lé₅ jág₁ dse₃ quió'₅ Diú₄, on₃jua'₅₄ con'₂ lé₅ jág₁ quió'₅ dsa₂
mi₂güí₃. Ia₁ dsón'₂ bá₄ jág₁ dse₃ quió'₅ Diú₄ nē₅, a₂jmo₃ léi₄ tē₂'au'₂
'nia'₂ dsa₂ i₂én₂. ¹⁴ Rin'₅₄ jniog₄, lia'₂ con'₂ ca₂ñag'₅₄ 'nia'₂ uig₅
qui₂ca₂'ein₃ dsa₂ go'₄ 'nia'₂, ca₂i₃ñí'₂ 'nia'₂ jui₁lia'₂ ca₂jmá'₂ dsa₂ guá'₅

quián₅ Diú₄ i₂tián₅ Judea i₂ma₂lín₅ quián₅ Cristo Jesús. Le₂jaun₂ bá₄ ca₂qui₂co₂'ein₃ dsa₂ judíos dsa₂ go₅₄. ¹⁵ Dsa₂ judíos 'éi₂ bá₄ i₂ca₂jñi₃ Te₁gui₅₄ Jesús, i₂ca₂jme₃dsian₅ dsa₂ i₂chen₄ quián₅ Diú₄ né₃. Jaun₂ ca₂'uág₂ bá₄ jnia₅₄. Tsá₃ 'nioi₃ Diú₄. 'Njai₅₄ bá₄ ca₂le₃jín₃ dsa₂. ¹⁶ Cha₂ jme₁lin₅₄ 'niog₂ jnia₅₄ chei₅₄ jág₁ dsi₂nau₂, ia₁jaun₂ líon₂ 'éi₂ ján₃. La₁ 'éi₂ bá₄ jné₅ jui₅. Jaun₂ le₂nē₅ caun₂ dsi₂juē₂ bá₄ dsáu₁. Co₂nei₅₄ ma₂já₅ a₂i₄ 'nei₂ dsí₅ Diú₄ ja₁coin₂.

Dsi₂jio₅ dsí₅ Pablo dsó₃ táng₃ jui₅ Tesalónica

¹⁷ Rin₅₄ jniog₄, lia₂ con₂ jme₁ca₂tén₄ co₂'na₂ rin₅₄, o₁jnia₅₄ tsá₃ né₅ jnia₅₄ 'nia₂, la₁ tion₅₄ bá₄ jme₁dsau₂ dsi₅ jnia₅₄, 'ñio₅ lín₃ jme₁'niog₂ jnia₅₄ dsau₅₄ táng₃ dsi₁né₄ 'nia₂. ¹⁸ Jaun₂ dsón₂ bá₄ jme₁'niog₂ jnia₅₄ dsau₅₄ dsi₁jín₁ 'nia₂. Jniá₂ Pa₄ 'lióng₂ ráun₂ jme₁ca₂quín₃ bí₂ a₂nei₅₄. La₁ i₂sē₃dsen₃ bá₄ ca₂jné₃ jui₅. ¹⁹ Jaun₂ ċ'e₂ jaun₂ a₂'ín₂ dsi₅ jnia₅₄ chong₂, a₂jmo₅ jnia₅₄ 'io₂, o₃ premio o₄quió₄ a₂jmo₁ jnia₅₄ táu₅ jē₁ma₂tē₂ rē₁guan₂ Jesús Te₁gui₅₄ quián₂? ¿On₁jua₅₄ o₄quián₂ 'nia₂ bá₄? ²⁰ Uig₅₄ quián₂ 'nia₂ bá₄ ñí₄ 'io₂ jein₅ jnia₅₄; o₄quián₂ 'nia₂ bá₄ jme₂go₃ dsa₂ sián₂ né₃

3 ¹ Jaun₂ né₃, ia₁ tsá₃ ma₃tián₂ jnia₅₄, ca₂rē₃'ñio₃ bá₄ dsi₅ jnia₁ guio₅₄ juig₂ Atenas. ² Jaun₂ ca₂chen₅₄ jnia₅₄ Timoteo rin₅₄ ca₂i₁jín₁₂ 'nia₂, ia₁ i₂ma₂lín₅ quián₅ Diú₄ bá₄ 'éi₂, ia₁ jmo₂₃ ta₁ co₂lē₅ quian₅₄ jnia₅₄ a₂jme₂tiín₂₃ dsa₂ jág₁ dse₃ quió₅ Cristo. Lé₂ le₃juá₂ 'éi₂ lia₂ tí₅ jág₁ cué₃ bí₂ 'nia₂ a₂le₃'én₂ gué₄ 'nia₂, ³ ia₁jaun₂ 'i₁jan₂ 'nia₂ tsá₃ dsi₃lén₂ cau₅ 'uig₅₄ a₂co₂'ein₅ dsa₂. Ia₁ ñi₅₄ bá₄ 'nia₂ guiong₅₄, 'éi₃ nē₅ tio₅₄. ⁴ Lia₂ con₂ jme₁tio₅₄ jnia₅₄ quian₅₄ 'nia₂ le₂jniá₅, ca₂jua₅₄ jnia₅₄ a₂tion₅₄ niog₅ ñag₅₄ 'uig₅₄, jaun₂ le₂jaun₂ ca₂lē₃ né₃, jaun₂ ma₂ñi₅₄ bá₄ 'nia₂. ⁵ Jaun₂ lē₃, ia₁ tsá₃ ma₃tió₅ 'i₅ dsi₃, ca₂tsíng₂ dsa₂ ca₂i₁ñag₁₂ 'a₂ lia₂ lē₅ ma₂'én₂ 'nia₂ tiong₅₄, ia₁ con₂ tsá₃ ñó₅ nē₁ca₂'liog₃ i₂sē₃dsen₃ a₂jmo₂ 'nia₂ cosa 'lig₅₄. Tsá₃ ma₃ta₁ tí₄ ta₁ quián₂ jnia₅₄, jua₅₄ mei₂ gué₃ le₂jaun₂.

⁶ La₁ ma₂guán₅ bá₄ táng₃ Timoteo juig₂ Tesalónica, quion₂ jág₁ dse₃ 'én₂ bá₄ 'nia₂ jág₁ quió₅ Diú₄, 'nió₃ bá₄ 'nia₂ ríng₂ le₂jang₂ le₂jang₂. Juá₂ bá₄ ján₃, jmo₂ 'nia₂ 'io₂ a₂dsau₂ 'au₂ 'nia₂ jnia₅₄ ca₂le₃jé₃ jmig₄, a₂'ín₅ 'au₂ 'nia₂ 'ñio₅ lín₃ jag₅₄ jnia₅₄, le₂jaun₂ bá₄ jnia₅₄ ján₃ jui₁lia₂ 'nia₂ 'ín₅ dsi₅ jín₄ 'nia₂. ⁷ Jaun₂ le₂nē₅, rin₅₄ jniog₄, tē₃jē₄ uig₅₄ chong₂ 'i₅ dsi₅ jnia₅₄, la₁ ca₂'ág₂ lián₂ dsi₅ jnia₅₄ jme₁ca₂rē₃ne₄ 'a₂ lia₂ lē₅ a₂'én₂ 'nia₂. ⁸ 'Io₂ jein₅ jnia₅₄ chong₂ jme₁ca₂rē₃ne₄ tión₂ bá₄ 'nia₂ tiá₂ tē₂le₃ quió₅ Te₁gui₅₄. ⁹ Ca₂lia₂ tsá₃ ne₄ jnia₅₄ 'a₂ lia₂ cuē₅₄ ti₁ 'mag₄ Diú₄ con₂ dsi₂ten₅₄ o₄quió₄ a₂'io₂ jmo₂ jnia₅₄ le₃ne₄ Diú₄ quián₂ o₄quián₂ 'nia₂. ¹⁰ Ca₂le₃jé₃ dsi₅ bá₄ jnia₅₄ mi₂ lia₂ 'uē₂-jmi₂ ne₄ Diú₄ a₂cuē₃ jmig₄ dsi₁jín₁ 'nia₂, jaun₂ jme₁'ñia₅ gué₄ jnia₅₄ a₂'nió₅ le₃tín₂ gué₄ 'nia₂ a₂le₃'éng₂.

¹¹ 'Niog₂ jnia'₅₄, Diú₄ Jmei₂ 'ñiog₅ quian'₅₄ Te₁gui'₅₄ Jesucristo, jme₃'o₅₄ cuë₃ jmi₄ dsi₁náu₅ dsi₁jing₅₄ 'nia'₂. ¹² Jui₁jmo₅₄ bá₄ Te₁gui'₅₄ jui₁dsi₂cón₃ a₂jme₁'nió'₄ gué₄ 'nia'₂ ríng'₂ le₂jan'₂ le₂jan'₂ 'nia'₂ quian'₅₄ ca₂le₃jín₃ gué₄ jui₁'ein₂ gué₃ dsa₂ jui₁lia'₂ 'nio₃ jnia'₅₄ 'nia'₂. ¹³ Jui₁jmo₅₄ bá₄ Diú₄ 'ag₃ tiá₂ 'au'₂ 'nia'₂, lén'₂ 'nia'₂ dsa₂ i₂ma₂lé₅ 'í₁ quiáin₅ i₂tsá₃ ma₃'e₂ dsáu₁ cha₂ ne₄ Diú₄ Jmei₂ jniog₄ jē₁ma₂tē₂ rē₁jñió'₂ Te₁gui'₅₄ Jesús quian'₅₄ ca₂le₃jín₃ i₂quiáin₅.^b

'A₂ lia'₂ dsi₂ten₅₄ le₃chan₂ dsa₂ con'₂ 'ñio₂ dsí₅ Diú₄

4 ¹ Nē₃ né₃ rin'₅₄ jniog₄, mi₂ jnia'₅₄ ne'₅₄ 'nia'₂ tē₂le₃ o₄quió'₄ Te₁gui'₅₄ Jesús, a₂i₁nio'₄ 'nia'₂ lia'₂ con'₂ 'ñio₂ dsí₅ Diú₄, jui₁lia'₂ ca₂jme₁tag₅ jnia'₅₄. Le₂jaun₂ caun₂ jmo₄ 'nia'₂ ca₂le₃jē₃ jmi₄. ² Nī'₅₄ bá₄ 'nia'₂ 'a₂ lia'₂ lé₅ jág₁ ca₂jme₁tag₅ jnia'₅₄, 'éi'₃ ca₂cuë₃ Te₁gui'₅₄ Jesús. ³ A₂'nio₃ Diú₄ a₂i₁nio'₄ 'nia'₂ líng'₅ dsa₂ i₂ma₂lé₅ 'í₁ ca₂ne₅₄ i₂ma₂quiáin₅ 'ñiog₅; 'i₁jan₂ tsá₃ 'ein₂ jui₁nió'₄ jág₁ a₂tsá₃ dsi₂ten₅₄ nió'₃. ⁴ Jui₁le₂ñi'₅₄ 'nia'₂ le₂jang'₂ le₂jang'₂ 'a₂ lia'₂ tiáng'₄ quiang'₅₄ dsa₂ mí₂ quiáng'₂, lé₅ 'í₁, jme₁gain'₃ 'nia'₂.^c ⁵ On₃jua'₅₄ a₂lē₁qui₂dsi₂jein₅ 'au'₂ 'nia'₂ 'lig'₅₄ jui₁lia'₂ jmo₅ dsi₂nau₂ i₂tsá₃ Diú₄ cuín₅. ⁶ Jaun₂ 'i₁jan₂ tsá₃ 'ein₂ jui₁qui₂dsi₂juín₅₄ jua'₅₄ jme₃gain₂₃ rīn'₅₄, quian'₅₄ 'i₁caun₂. Ia₁ Te₁gui'₅₄ bá₄ jēin'₃ uig₅ ca₂le₃jē₃ a₂le₂nē₅, jui₁lia'₂ ma₂chei₅₄ jnia'₅₄ 'nia'₂ le₂jñiá₅. ⁷ Ia₁ on₃jua'₅₄ jaun₂ ma₂tē₅ Diú₄ a₂qui₂dsi₂jñiog₅ dsi₅ 'lig'₅₄; a₂jaun₂ bá₄ ca₂tē₃ a₂le₃chong₂ jniog₄ jñió₅. ⁸ Jaun₂ le₂nē₅, jui₁lia'₂ i₂tsá₃ gue₅ jág₁ a₂jme₂tág₁ jnia'₅₄ la₂, on₃jua'₅₄ dsa₂ tsá₃ guein₂₃; Diú₄ bá₄ tsá₃ guein₂₃, i₂ma₂cuín₃ Jme₂dsí₂ Jñió₅ quiáin₅. ⁹ Tsá₃ 'e₂ tion₅₄ 'nió'₅ jua'₅₄ a₂juá'₄ jniá₂ tó'₄ ne₄ si₂ la₂, jua'₅₄ a₂juá'₄ jniá₂ 'a₂ lia'₂ dsi₂ten₅₄ jme₁'nió'₄ 'nia'₂ dsa₂ i₂'én₂ ríng'₂. Ia₁ ma₂ca₂jme₃tag₅ bá₄ Diú₄ 'ñiog₅ 'a₂ lia'₂ jme₁'nió'₃ 'nia'₂ ríng'₂ le₂jang'₂ le₂jang'₂. ¹⁰ Jaun₂ le₂nē₅ bá₄ jmo₂ 'nia'₂ ja₁con₂ rín'₂ 'nia'₂ i₂'én₂ i₂tián'₅ 'uē₃ Macedonia. Ia₁ mi₂ jnia'₅₄ ja₁con'₂ 'nia'₂, rin'₅₄ jniog₄, caun₂ jui₁dsi₂tsón₃ bá₄ a₂'nióg'₃ 'nia'₂ ríng'₂. ¹¹ Quen'₂ 'nia'₂ bí₂ tián'₂ 'nia'₂ 'ei₅ tei₄, jmo₄ 'nia'₂ jmá'₃ con'₂ a₂ca₂tín'₂ 'nia'₂ jmó'₂ guiong'₅₄, jmo₄ 'nia'₂ ta₁ quiáng'₂ quian'₅₄ gog'₂-tag'₅₄, jui₁lia'₂ qui₂ma₂jua'₅₄ jnia'₅₄ le₂jñiá₅, ¹² ia₁jaun₂ i₁nio'₄ 'nia'₂ caun₂ jui₅ a₂jme₃go₃ dsa₂ sián'₂ i₂tsá₃ 'én₂, ia₁jaun₂ tsá₃ lé₅ jua'₅₄ cha₂ a₂'nió'₅ quián'₂ 'nia'₂.

A₂jñió'₂ Te₁gui'₅₄

¹³ Rín'₅₄ jniog₄, tsá₃ 'niog₂ jnia'₅₄ jua'₅₄ tsá₃ ñi'₅₄ 'nia'₂ 'e₂ lé₂ quian'₅₄ dsa₂ 'én₂ i₂ma₂dsan₃, ia₁jaun₂ tsá₃ jmó'₂ 'nia'₂ 'lia'₂ 'au'₂ jui₁lia'₂ 'lia'₂ dsí₅ dsa₂ i₂tsá₃ jmi₄ cha₂ quió'₅ jua'₅₄ tīn'₄. ¹⁴ Jaun₂ le₂nē₅, jui₁lia'₂ 'éin₂

^b13 lit. "dsa₂ jñió₅ quiáin₅."

^c4 o₃, "Jui₁le₂ñi'₅₄ 'nia'₂ le₂jang'₂ le₂jang'₂ 'a₂ lia'₂ jme₁'uang'₅₄ ni₁ñi'₁ guiong'₅₄, lé₅ 'í₁, con'₂ dsi₂ten₅₄."

jniog₄ a₂ca₂jon₃ Jesús, a₂ca₂jein'₅₄ táng₃ né₃, le₂jaun₂ bá₄ 'éin₂ jniog₄ ján₃ a₂jme₃jen'₅₄ Diú₄ co₂lë₅ quian'₅₄ Jesús dsa₂ i₂ca₂dsan₃ i₂'én₂ le₃quió'₅.

¹⁵ Jaun₂ lë₃ chei₂ jnia'₅₄ 'nia'₂ jui₁lia'₂ ca₂jme₃tag₅ Te₁gui'₅₄, con'₂ jniog₄ i₂chong₂ ca₂lia'₂ ca₂të₂ jmig₄ a₂guan'₂ Te₁gui'₅₄, 'i₁jan₂ tsá₃ 'ein₂ jua'₅₄ i₂dsi₃jniá₄ con'₂ gué₄ dsa₂ i₂ma₂dsan₃. ¹⁶ Ia₁ 'niog₅ bá₄ Te₁gui'₅₄ sióin₃ guei'₅₄ i₂juíg₃ guió'₃ tiá₂ jmo₃ 'éi'₃, quian'₅₄ jág₁ quió'₅ ángel i₂'uan'₂ gué₄, dsi₃'ein₅₄ ní₁ trompeta quió'₅ Diú₄ né₃. Jaun₂ gué₄ ca₂le₃jín₃ dsa₂ i₂'én₂ le₃quió'₅ Cristo i₂ma₂dsan₃, qui₃jein'₅₄ le₂'uig₅₄. ¹⁷ Jaun₂ jniog₄ i₂chong₂ gué₄, i₂të₁'niá₄ gué₄ né₃, chó'₂ co₂lë₅ jë₄ jnei₅ quian'₅₄ dsa₂ i₂ma₂dsan₃ 'éi₂, a₂dsi₂jme₁jen'₂ Te₁gui'₅₄ guei'₅₄ dsi₁guig₂. Jaun₂ le₂në₅ dsi₁tió'₄ co₂tan₅₄ quian'₅₄ Te₁gui'₅₄. ¹⁸ Jaun₂ lë₃, cuë₅₄ 'nia'₂ lián'₂ ríng'₂ quian'₅₄ jág₁ la₂.

5 ¹ La₁ tsá₃ tion₅₄ jua'₅₄ a₂juá'₄ jniá₂ tó'₄ ne₄ si₂ 'e₂ 'ió'₄ 'e₂ jmig₄ a₂lé₂ jaun₂. ² Jaun₂ ma₂le₁ni'₅₄ bá₄ 'nia'₂ dse₃ guiong'₅₄, jmig₄ a₂jnió'₂ Te₁gui'₅₄ con'₂ tsá₃ ján₅ bá₄ dsa₂, jui₁lia'₂ ja₁já₄ jan₂ dsa₂ 'ang₂ caun₂ 'uë₂. ³ Jë₁ma₂të₂ rë₁juá'₂ dsa₂: “Ca₂le₃jé₃ lé₅ 'í₁, tei₄ bá₄ 'ei₅”, të₃jë₄ jaun₂ 'én₂ con'₂ tiá₂ ne₄ quió'₅ dsa₂ 'éi₂. Lé₂ jui₁lia'₂ ja₁jén'₅ 'io₅₄ i₂quian₅ guein₂. Con'₂ tsá₃ rë₂jáin₁ jë₁ma₂tá'₂ qui'₂ uig₅ quió'₅, tsá₃ a₁jaun₂ a₂lióin₂ jua'₅₄ a₂tsá₃ ngá₃ jmi₁uig₅ jaun₂. ⁴ La₁ 'nia'₂ rin'₅₄ jniog₄, tsá₃ tion'₅₄ 'nia'₂ jë₄ qui₁né'₃, jaun₂ tsá₃ lé₅ jua'₅₄ jo₅₄ jmig₄ jaun₂ quián'₂ 'nia'₂, jui₁lia'₂ ja₁jo₅ jan₂ 'ang₂. ⁵ Ia₁ ca₂le₃jín'₃ bá₄ 'nia'₂ líng'₅ jaun₅ quián₅ ja₁tág₅ si₂, quian'₅₄ a₂jmi₂ né₃. Tsá₃ téi₅ jniog₄ a₂'uë₂, on₃ guë'₂ jë₄ qui₁né'₃. ⁶ Jaun₂ tsá₃ 'nió'₅ guág₃ jniog₄ jui₁lia'₂ güin₂ i₂lin₅₄. Le₁jnio₂ ne₄ bá₄ jniog₄ 'nió'₅ jmó₁, lei₅₄, 'en₅₄ dsi₅. ⁷ A₂'uë₂ bá₄ güin₂ dsa₂, ján₃ guë'₂ a₂'uë₂ bá₄ 'ín₂ dsa₂ 'en₅. ⁸ La₁ jniog₄ né₃, i₂téi₅ a₂jmi₂, 'nió'₅ lei₅₄, 'en₅₄ dsi₅. 'Nió'₅ qui₁jmó₁ 'í₁ quian'₅₄ a₂'éin₂ quian'₅₄ a₂jme₁'nió₄ rin'₅₄ né₃, në₂jag₄ bá₄ qui₂rë₂lióg₃ ní₁ le₁dsi₅, lé₅ 'í₁; a₂'ín₂ dsi₅ jniog₄ a₂tág'₄ né₃, lé₅ co₂'nió'₄ ní₁ a₂'i₄ mi₂dsi₄ 'lióg₂, lé₅ 'í₁. ⁹ Ia₁ on₃jua'₅₄ jaun₂ ca₂'ag₃ Diú₄ a₂gué₁ jniog₄ 'nei₂ a₂'i₄ dsí₅; a₂jaun₂ bá₄ ca₂'ag₃ a₂lió₂ jniog₄ të₂le₃ quian'₅₄ Te₁gui'₅₄ Jesucristo quián₂. ¹⁰ O₄quián₂ jniog₄ ca₂join₃ ia₁jaun₂ dsi₁'io₁ co₂lë₅ quiaín'₅₄, të₁lia'₂ chong₂, o₃ jë₁ma₂dsau₃ 'e₂.^d ¹¹ Jaun₂ caun₂ dsia₄ 'nia'₂ tiá₂ 'au'₂, cuë'₅₄ bí₂ ríng'₂ le₂jang'₂ le₂jang'₂, jui₁lia'₂ ma₂jmo'₂ në₅.

Ton'₂ Pablo jág₁ dsa₂ riin'₅₄

¹² Rin'₅₄ jniog₄, mi₂ jnia'₅₄ a₂jme₁gang'₃ dsa₂ i₂jmo₅ ta₁ jë₄ quián'₂ 'nia'₂, i₂jio₅ ne₄ jui₅ le₃quió'₅ Te₁gui'₅₄, i₂to'₂ jág₁ dse₃ né₃. ¹³ Ca₂tín'₂ 'nia'₂ jme₁gain'₃ 'nio₅ lín₃, a₂jme₁'nió₄ né₃, o₄quió'₄ ta₁ a₂jmo₂₃. Jui₁'ei₅ bá₄ tei₄ tion'₅₄ 'nia'₂ le₂jang'₂ le₂jang'₂.

^d10 lit. “chi₂jua'₂ le₁jnio₂ ne₄ jniog₄, o₃ le₁guág₃ 'e₂.”

¹⁴ Ján₃ guë'₂ le₂jaun₂ rin'₅₄ jniog₄, jén₃ 'nia'₂ dsa₂ i₂tsá₃ ta₁ 'nio₃ jmo₃. Cuë'₅₄ 'nia'₂ bí₂ dsa₂ i₂tsá₃ lín₄ niog₅ tiá₂ dsí'₅, jme₁'on₁ 'nia'₂ dsa₂ 'uan'₅₄, jme₁juin'₂ 'nia'₂ 'au'₂ quian'₅₄ ca₂le₃jín₃ ríng'₂.

¹⁵ Jmo₄ 'nia'₂ 'í₁, ia₁jaun₂ 'i₁jan₂ tsá₃ jén'₃ 'lig'₅₄ quió'₅ i₂jmo₃'₂ 'lig'₅₄. Të₂le₃ caun₂ o₂nó'₅ bá₄ 'nia'₂ jmo₄ a₂dse₃ co₂tan₅₄ quian'₅₄ rín'₂ 'nia'₂ le₂jang'₂ le₂jang'₂ quian'₅₄ gué'₄ ca₂le₃jín₃ dsa₂.

¹⁶ Tián'₂ bá₄ 'nia'₂ 'io'₂ jéng'₂ co₂tan₅₄. ¹⁷ Chi₂len'₅₄ 'nia'₂ Diú₄ lia'₂ tsá₃ 'na₂. ¹⁸ Cuë'₅₄ 'nia'₂ ti₁'mag'₄ Diú₄ ne₄ ca₂le₃jé₃, ia₁ a₂në₅ bá₄ 'nio₂ dsí'₅ Diú₄ të₂le₃ quián'₂ 'nia'₂ o₄quió'₄ Cristo Jesús.

¹⁹ Tsá₃ lë₁ag₂ 'nia'₂ si₂ quió'₅ Jme₂dsí₂ Jnió₅. ²⁰ Në₁jua'₂ 'ein₂ 'é₂ jág₁ a₂guéi'₅ quió'₅ Diú₄, tsá₃ lë₁jmo₂ 'nia'₂ jua'₅₄ a₂tsá₃ jeng'₅₄. ²¹ Quion₂ de'₂ 'nia'₂ 'í₁ ca₂le₃jé₃ a₂në₅, jaun₂ chan'₂ bá₄ 'nia'₂ jmá'₃ a₂dse₃. ²² Co₂dsia₅ jmo₄ 'nia'₂ cau₅ ca₂le₃jé₃ ne₅₄ a₂'lig'₅₄.

²³ 'Niog₅ Diú₄ i₂jmo₅ 'ei₅ tei₄, jui₁jmo₁₂ a₂lén'₂ 'nia'₂ dsa₂ jnió₅ co₂nei'₅₄; jui₁le₅₄ bá₄ 'í₁ 'nia'₂, ta₁jang'₂: lia'₂ jme₂dsí₂, lia'₂ 'au'₂, lia'₂ ñi'₄ 'nia'₂; ia₁jaun₂ tsá₃ 'ein₂ lé₂ le₃bóg'₂ dso₄ jë₁ma₂të₂ rë₁guan'₂ Te₁gui'₅₄ Jesucristo quián₂. ²⁴ I₂ma₂të₃ quián'₂ 'nia'₂ tí₅ bá₄ jág₁ quió'₅, jaun₂ jme₃ti₃ bá₄ ca₂le₃jé₃ a₂në₅.

'Ág'₅ jág₁ jë₁ca₂tó'₂

²⁵ Rin'₅₄ jniog₄, chi₁len'₄ 'nia'₂ Diú₄ o₄quián₂ jnia'₅₄.

²⁶ Cuin'₅₄ Diú₄ ca₂le₃jín₃ rin'₅₄ a₂qui₁chén'₁^e 'nia'₂ quió'₅ ríng'₂, a₂lë₅ léi₄ a₂ma₂'ei₅ caun₂ jág₁ a₂le₁jé₃ 'au'₂ quian'₅₄ ríng'₂.

²⁷ Mi₅ jniá₂, lia'₂ con'₂ lë₅ 'éi'₃ quió'₅ Te₁gui'₅₄, 'í₂ 'nia'₂ si₂ carta la₂ jin₄ ca₂le₃jín₃ rin'₅₄.

²⁸ Jui₁jme₂gu'₅₄ Te₁gui'₅₄ Jesucristo quián₂ jniog₄ ca₂le₃jín₃ 'nia'₂. Co₂në₅.

^e26 Caun₂ tag₄ a₂jme₁chí'₄ lia'₂ con'₂ ca₂jmo₃ Pa₄ si₂ la₂.